

Vun driweriwer

erscheint auf www.lenauheim.de

monatliche
Erscheinung

Juli 2020

von Helen Alba

Alfred Hans Mühlroth werd 90 Jahr alt

Es Hemweh hat ne zruck getrieb

Die Pipatsch-Leser kenne ne unerm Name Vetter Fredi Mühlroth, er hat schun vill un Scheenes for uns alli gschrieb. Zu seim 90. Geburtstach (am 17. Juli 2020) winsche mer em Vetter Fredi beschi Gsundheit, Glick, Zufriedenheit un noch vill Schaffenskraft.

Meh iwer sei Lewe erfahrt ihr, liewi Leser, aus der Banater Zeitung vum 15. Juli 2020.

„De Mensch macht solange er lebt!“

Weil mer sich in dere wirri Zeit nit naner ufsuche soll, tut mer halt mitnaner telefoniere. Un so wees mer, wie dass es uns geht, ob mer gsund sin. So war des ach doneilich, wie ich vun Temeschwar aus de Vetter Fredi in Lenauheim angeruft han. Es war e stark intressantes Gspräch, obzwar ich schun vill gewisst han, is noch so manches derzu kumm:

„Es kummt mer gar nit zum Glaawe, dass jetz schun 30 Jahr vergang sin, seit ich mit meiner Frau Lenauheim verloss han un uf Deitschland zu de Kinner gezoo sin. Ich sin stark schwer fort. Weder meiner Frau noch de Kinner han ich gsaat, wie stark mer die Heimat fehle tut. Wie dann awer mei Frau gstorb is, vun selmols an is mer nor noch eene Gedanke nohgeloff: ich will zuruck, hem uf Lenauheim. So sin ich halt erschter immer uf Bsuch gfahr. Bis mer ufmol, es war grad im Heimatmuseum, die Idee kumm is, for immer zruck uf Lenauheim zu kumme. Es Haus meiner Schwester war leer gstann. Des han ich kaaft un scheen hergericht. Do sin ich jetz seit fascht zehn Jahr wieder derhem.“

„Wann`s mer zammgeht....“

Mit was sich e 90jähriger die Zeit vertreibt, des hat de Vetter Fredi ach während unsrem Telefongspräch verrot:

„Wer iwer 50 Jahr lang in eem Ort, immer uf demselwe Platz gelebt hat... des kann mer nit vergesse. Un es tut mer gar nit leed, dass ich zruck in mei Heimatort kumm sin. Do will ich bei meine Ahne bleiwe, ihre Gräwer ufm Friedhof bsuche, an se denke un for se bete. Wie ich de Tach verbring? Mit Schreiw, Kloppe un Spaziere. Ich geh so vun eem Haus zum anre, es intressiert mich, wer jetz in de ehemols deitsche Heiser wohnt. In Lenauheim sin jo nor noch 17 deitschi Seele. Des anri sin Ungare un Rumäner. Un wann`s mer zammgeht, will ich ufschreiw, wer in wellem Haus wohne tut. Derbei is de Kopp halt wichtich, wann es Hern soweit funktioniert, dass mer niemande beleidiche tut, dass mer wees was mer zu tun hat.... Des is stark wichtich in meim Alter. Ich kann nit klaae. Mit de Kinner in Deitschland tu ich oft telefoniere, e älteri Frau fiehrt mer de Haushalt un git owacht uf mich. De Mensch macht un macht.... solange er kann“!

E „Liebsbrief“ vum Vetter Fredi

Es sin dere Zeit schun phaar guti Johre vergang. Selmols war in Lenauheim die Veranstaltung „Kinder des Dorfes“ uf der Tagesordnung. Ich han villi Bekannti getroff un ach es Verzähle hat ke End holle wille. De Vetter Fredi Mühlroth hat mer ufmol e Brief in die Hand gedrickt, mit de Aue geblinselt un gsaat, des wär e Liebsbrief. Un wie ich ne ufmach – ja do han ich mich stark gfreit. Es ware im Brief Beiträch for unser Pipatsch. Un do hat er mit dem Liebsbrief sogar recht ghat. Weil er schreibt doch in Schwowisch, weil des ihm Gfalles macht – „un aus Liebe zum Banat, zu Schadat un zu unsrer Pipatsch“.

Aus der Richterzeit – e Schwob mitm Herz ufm richtiche Fleck!

Zwaa Jahr druf sin ich zum gleiche Anlass wieder mitm Vetter Fredi Mühlroth in Lenauheim zammkumm. Mir han iwer so manches vun frieher un vun heizutach verzählt. De Vetter Fredi is in Fahrt kumm:

„Ich war johrelang Richter un Vizerichter do in Schadat. Als solcher han ich mit de Verwaltungsprobleme die meishti Arweit ghat. In dere Zeit sin Brunne gebohrt, die Gehsteije asphaltiert gin, Plaschter raus, Beton gemacht, Strooße gebaut, vun Hatzfeld doraus, dann is die Strooß Schadat – Bogarosch gschottert wor. Efter han mer Ufträch ausfiehre misse, grad wann uns die zuwider ware un nit gepasst han. Es war e scheeni, reichi Gemeinde. Die meischte Bewohner ware Schwowe. In seller Zeit, des ware die 70er Johre, hat unser Leit schun es Deitschlandfiewer gepackt ghat. Sie han jo vill bleche misse, bis se die Einreise ghat han, sie sin schun mit eener Schuldelascht ufm Buckl vun derhem fort. Es erscht die jingre Leit, sie han so staat un staat ihre Angeheeriche nausghol. Ich war eener vun de Letschte, wu gang is in de 90er Johre. Was is mer dann anres iwerich geblieb? Die Kinner ware schun längscht fort, un do hucke bleiwe, des han ich a nit wille.

Es sin jo fascht ke Leit me do, 4898 Persone insgesamt in Lenauheim, Bogarisch un Grawatz, laut Volkszählung 2011. Zu meiner Richterzeit han mer total 8000 Einwohner ghat. Jetz is 30 Prozent vun der Jugend im Ausland. Es stehn vill Heiser leer, es is kenner do, wu die gudi Erd verarweite sellt. Die wu do sin, sitze liewer uf der Gass un `spautze`. Mir ware die letschte Johre schun arm dran. In de 80er hat mer schun bemerkt, es geht abwärts. Domols han mer als Gemeinde noch fünf Millione Umsatz ghat. Selmols is gsaat gin: macht patriotischi Arweit. Un ob die Leit han wille oder nit – es is vill `freiwillich` gearweit gin“.